

Wer die Wahl hat ...

Du konnsd im Aacheblig hiekumme wohie de willst, iwverall werrd vunn de Beiemoosderwahl geredd unn iwverall werrde gefroochd, ei wie issen dess, was moonsden du, wer omm End gewählt werrd?

Aach moin ahle Kummbeer Schorsch hott doodemett oogefonge, wie merr unne omm Moo uffere Bonk gesetze unn uffs Wasser geguggd hawwe. „Unn, wer werrds?“, hodder mich gefroochd.

Ich habb mich erumgedrehd, ob ooner hinner merr stieht, doo war awwer kooner unn doo werrderrs mett mir gehabbd hawwe.

„Schorsch“, saach isch, „mir warn uns doch oonisch, dass merr doo driwwer nitt redde wolde.“

„No ja“, seet de Schorsch, „ess kennt joo soi, dassdes dir onnersders iwverleeschd host.“

„Naa“, gebb isch ze Antwort, „mir hadde ausgemacht, dass du unn doi Fraa unn dass isch unn die Fraa denjenische wähle dut, den jeder vunn uns ferr de Rischdische halde dut. Wischdisch iss halt, dass merr iwverhaupt wähle gieh.“

„Mir mache dess medde Briefwahl“, seet doo de Schorsch, „doo kriehsde die Babiern unn dehoom omm Kischedisch konnsde immer nochemol iwverleesche, bevor de doi Kreizje mächst.“

„Dess mache mir aach su“, saach isch, „doo wolle merr nor hoffe, dass vill Leit wähle gieh unn donn wadde merrs ab, wer omm End gewunne hott. Awwer egal wers werrd, wenn die widder mol ebbes baue wolle solle se uffheern meddem ersde Spadestich, ich muss doo immer grinse.“

„Ei warum donn?“, frächt de Schorsch.

Isch habb werklisch gegrinsd. „Ess iss halt falsch, weil nooch emm ersde Spadestich misst joo enn zweide kumme, awwer ess dut koon zweite Spadestich gewwe, weil donn kimmt immer gleich de Bagger. Isch moon ess wär besser, die Stadt deet sich su enn kloone Bagger meddere gruß Schaufel ooschaffe unn doo kennde sich die Städtische unn Offizielle ooner nooch emm onnern druffsetze unn e bissi doorum baggern.“

De Schorsch hott de Kobb geschiddeld. „Ei horsch emol, Honnes, du moonst doch nitt, dass dess ess Wischdischsde vunn de Beiemoosderwahl wär?“

„Naa“, saach isch unn grins noch mieh, „dess Wischdischde nitt, awwer uff su enn kloone Bagger kennde sich nooch de Wahl villeischd alle Parteie oonisch wernn, weil joo egal wer drookimmd vill gebaut wernn soll in Flerschem. Wicker unn aach in Weilbach.“

Eiern Honnes